

Ե .

Մօտ իմ եարուն մի՛ նըստիլ, թե հազար ես ինձ սիրելի.
 Ինձի խիստ դըժուար կուգայ քանց հոգւոյս քակտիլն անելի.
 Այլում ալելում ասեմ, իսկի ճար մահուն չիլինի:

Զ .

Մըտիկ եարին արեք որ կ'ելներ կանուխ ի քընուն.
 Հանցկուն թուումով կ'ելներ զինչ մանուկն ելներ ի գինուն.
 Հագեր տուպարայ շապիքն ու կ'երթեր հովըն ծառերուն.
 Շեկ ժամն ի հոսել առներ, կու կաթեր քըրտիկքն ուներուն:

Է .

Գանգատ մի կ'ուզեմ ասեմ, ես ասեմ լուսուն արեւուն.
 Երբ սեր չես հաներ ի հուն, է՛ր հանես մանուկն յարեւուն:

Ը .

Իմ եարն ի Հոռմոց ի վեր ուղարկեր շատ արմաղաններ,
 Թե ինք ի ռ նըման գըտեր, թող ազիզ արեւըս ապրի.
 Մեկ մ'այլ երթամ ես սիրեմ, դարակօզ 'ւ ինքըն նըման:
 Չանունն այլվի իր դնեմ, երբ կանչեմ՝ սիրտըն նըւաղի:

Թ .

Ա՛յ իմ պըզըկից եարուկ, քո ամեն տեղիկդ աղեկուկ.
 Զո ծոցն է ոսկի սընտուկ, ես ի մե՛ջըն դարիպ կաքուկ:
 Ա՛յ իմ արծաթե գուպայ, մարգարտե ծածկոցն ի վըրայ,
 Զո բունդ ի դըժար քարին, արծիւուն ահիկն ի վըրայ,
 Չըլես ելումուտ էնես, թե չասեն՝ Աղկեկ է նորա:

Ժ .

Հայրեն մի կամիմ ասել ի վերայ կարմիր խընծորին,
 Ամառն ի ծառին ճուղին ու ձըմեռն ի մեջ շուկային.
 Գային այն ճահիլ մանչերն, գընեին տան՝ին սիրողին:
 Սիրողն անօրեն լիներ, լուք կուտար ի ձեռքըն տըղին:
 Տըղան այլ տըղիմար լիներ, լուք դանակ քաշեր խընծորին,
 Խընծորն երկու կես աներ, մեկըն իր, մեկըն սիրողին: